

Atvinnuvega- og nýsköpunarráðuneytið
Skúlagötu 4
101 Reykjavík



sent á samráðsgátt

Reykjavík, 1. október 2020

Efni: Umsögn Samtaka atvinnulífsins um drög að reglum um reikningshaldslega meðferð leigusamninga í reikningsskilum leigutaka

Samtök atvinnulífsins (SA) hafa tekið til umsagnar ofangreint mál sem birt var á samráðsgátt stjórnvalda 17. september sl. Málið varðar reikningsskilareglu sem gildir um meðferð leigusamninga í reikningsskilum leigutaka. Stór félög og stórar samstæður skulu beita alþjóðlegum reikningsskilastaðli um leigusamninga en örfélagi, litlu félagi eða meðalstóru félagi er heimilt að velja á milli þess að beita gildandi alþjóðlegum reikningsskilastaðli líkt og stór félög eða að færa eingöngu fjármögnunarleigusamninga í efnahagsreikning en ekki rekstrarleigusamninga.

Að mati SA er jákvætt að örfélögum, litlum og meðalstórum félögum verði gert heimilt að velja minna íþyngjandi leið við meðferð leigusamninga. Hins vegar telja SA að tímabært sé að endurskoða hvernig lög um ársreikninga nr. 3/2006 (árl.) skilgreina stærðir fyrirtækja.

Í 11. tl. 2. gr. árl. er að finna skilgreiningu á félögum sem skulu semja ársreikning og samstæðureikning. Í a-c lið segir:

11. Félag: Félag skv. 1. gr. sem semja skal ársreikning og samstæðureikning samkvæmt lögum þessum:

a. örfélag: félag sem við uppgjörsdag fer ekki yfir mörkin á a.m.k. tveimur af þremur eftirfarandi viðmiðunum:

- 1. heildareignum: 20.000.000 kr.,*
- 2. hreinni veltu: 40.000.000 kr.,*
- 3. meðalfjöldi ársverka á fjárhagsárinu: 3,*

b. lítið félag: félag sem við uppgjörsdag fer ekki yfir mörkin á a.m.k. tveimur af þremur eftirfarandi viðmiðunum:

- 1. heildareignum: 600.000.000 kr.,*
- 2. hreinni veltu: 1.200.000.000 kr.,*
- 3. meðalfjöldi ársverka á fjárhagsárinu: 50,*

c. meðalstórt félag: félag sem er ekki lítið félag og sem við uppgjörsdag fer ekki yfir mörkin á a.m.k. tveimur af þremur eftirfarandi viðmiðunum:

- 1. heildareignum: 3.000.000.000 kr.,*
- 2. hreinni veltu: 6.000.000.000 kr.,*
- 3. meðalfjöldi ársverka á fjárhagsárinu: 250,*

Fjárhæðarmörk í framangreindri skilgreiningu hafa ekki uppfærst síðan árið 2016. Ýmsar skyldur fyrirtækja miðast við stærð þeirra, sbr. t.d. undanþáguheimild 7. mgr. 3. gr. árl. Ársreikningaskil fela í sér töluverðan kostnað og því er mikilvægt að viðmiðunarmörkin takmarki ekki um of heimildir smárra fyrirtækja til að nýta undanþágur.

Það sama á við í þessu tilviki. Ef setja á reglur sem veita litlum og meðalstórum fyrirtækjum heimild til þess að skrá leigusamninga með minna íþyngjandi hætti en stærri fyrirtækjum ná þær ekki markmiði sínu nema viðmiðunarfjárhæðir árs. séu uppfærðar.

Að mati SA er jafnframt brýnt að ráðuneytið taki til skoðunar undanþáguákvæði 1. mgr. 98. gr. laganna en þar eru viðmiðunarfjárhæðir alltof lágar og hafa ekki tekið breytingum síðan árið 2006.

Við innleiðingu tilskipana og reglugerða ESB vegna aðildar Íslands að EES er mikilvægt að gætt sé samræmis hér á landi við löggjöf annarra ríkja til þess að skerða ekki samkeppnisstöðu íslenskra fyrirtækja í alþjóðlegri samkeppni. Skilgreining ESB á ör-, litlum og meðalstórum félögum er eftirfarandi:

micro enterprise: fewer than 10 employees and an annual turnover (the amount of money taken in a particular period) or balance sheet (a statement of a company's assets and liabilities) below €2 million.

small enterprise: fewer than 50 employees and an annual turnover or balance sheet below €10 million.

medium-sized enterprise: fewer than 250 employees and annual turnover below €50 million or balance sheet below €43 million.

Ef horft er á stærðarviðmið lítilla og meðalstórra félaga í árs. eru þau nær framangreindri skilgreiningu ESB en örfélögin eru þar í engu samræmi. Þrátt fyrir smæð íslensks markaðar er áriðandi að hafa í huga að mörg íslensk fyrirtæki sem teljast smá í alþjóðlegum samanburði eru í alþjóðlegri samkeppni. Fleiri íslensk félög þurfa því að uppfylla ríkari kröfur heldur en gengur og gerist í samkeppnislöndum þar sem sömu félög teldust til örfélaga. Það hefur bein áhrif á samkeppnisstöðu þeirra.

Áður en þær reglur sem hér eru til umfjöllunar taka gildi er mikilvægt að ráðist verði í endurskoðun á framangreindum stærðarviðmiðum svo að ívilnandi heimildir fyrir lítil og meðalstór fyrirtæki hafi raunverulega þýðingu.

Virðingarfyllt,
f.h. Samtaka atvinnulífsins



Heiðrún Björk Gísladóttir

